

19. maj 2006

UPA 2006/96

**Naalakkersuinikkut sulinermut aningaasatigut tapiissuteqartarneq pillugu
Inatsisartut inatsisaata allanngortinneqarneranik Inatsisartut inatsisissaattut
siunnersuut kiisalu Inatsisartuni Naalakkersuisunilu ilaasortat
aningaasarsiaqartitaanerat il.il. pillugu Inatsisartut inatsisaata
allanngortinneqarneranik Inatsisartut inatsisissaattut siunnersuut**

pillugu

Inatsisartut Suleriaaseq pillugu Ataatsimiititaliaata

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Inatsisartut Suleriaaseq pillugu Ataatsimiititaliaat ulloq 11. maj 2006-imi
suliarinninnermini ukuninnga inuttaqarpoq:

Inatsisartut Siulittaasuat Jonathan Motzfeldt, Siumut, siulittaasoq
Inatsisartunut ilaasortaq Agathe Fontain, siulittaasup tullia siulleq, Inuit Ataqtigiit
Inatsisartunut ilaasortaq Ellen Christoffersen, Augusta Sallingimut sinniisussaq,
Atassut
Inatsisartunut ilaasortaq Astrid Fleischer Rex, Per Berthelsenimut sinniisussaq,
Demokraatit
Inatsisartunut ilaasortaq Vittus Mikaelen, Ruth Heilmannimut sinniisussaq, Siumut
Inatsisartunut ilaasortaq Anthon Frederiksen, Kattusseqatigiit Partiiat

Ulloq 16. maj 2006-imi suliarinninnermi ataatsimiititaliaq ukuninnga inuttaqarpoq:

Inatsisartut Siulittaasuat Jonathan Motzfeldt, Siumut, siulittaasoq
Inatsisartunut ilaasortaq Agathe Fontain, siulittaasup tullia siulleq, Inuit Ataqtigiit
Inatsisartunut ilaasortaq Otto Steenholdt, Augusta Sallingimut sinniisussaq, Atassut
Inatsisartunut ilaasortaq Palle Christiansen, Per Berthelsenimut sinniisussaq,
Demokraatit
Inatsisartunut ilaasortaq Ruth Heilmann, siulittaasup tullia sisamaat, Siumut
Inatsisartunut ilaasortaq Anthon Frederiksen, Kattusseqatigiit Partiiat

UPA 2006-imi siullermeerinerup kingorna aalajangiiffigisassatut siunnersuut Inatsisartut Suleriaaseq pillugu Ataatsimiititaliaata misissorpaa.

Siunnersuutip imarisaa

Naalackersuinikkut sulinermut aningaasatigut tapiissuteqartarnerup allangortinneqarnissaanik kiisalu aningaasarsiaqartitsinermut inatsisip allangortinneqarnissaanik siunnersuutikkut suliarineqartukku aqqissuussinermi maanna atuuttumi makku allangortinneqarnissaat siunnersuutigineqarpoq:

- Partiinut naalackersuinikkut suliniaqatigiiffinnut, kattusseqatigiinnut kisimiillutillu partiit kattusseqatigiillunniit avataasigut qinigaasunut ukiumut tunngaviusumik 300.000 kr.-inik tapiissuteqartoqartassaaq,
- Ilaasortamut ataatsimut ukiumut maanna tapiissutigineqartartut 100.000 kr.-init 125.000 kr.-inut qaffanneqassapput,
- Kalaallit Nunaanni paasisassarsiorluni angalanissamut Inatsisartunut ilaasortanut ukiumut aningaasaliunneqartartut 50.000 kr.-iusut ilaasortanut ataasiakkaanut tunniunneqartarnissaannik aningaasarsiaqartitaaneq pillugu inatsimmi piumasaqaat peerneqarpoq, tassungalu taarsiullugu ilaasortaatitat amerlassusiat naapertorlugit partiinut atugassiissutigineqartassallutik.

Taamaalilluni Kalaallit Nunaanni paasisassarsiorluni angalanissanut katillugit 1.500.000 kr.-it Inatsisartut kontoanni immikkoortinneqassapput. Siunertaq nalunaarlugu angalanissamut missingersuut tunngavigalugu akiliunneqarnissamik qinnuteqaateqarnikkut, angalanerullu kingorna Inatsisartut Allattoqarfiannut naatsorsuusiornikkut aningaasat taakku partiinit ataasiakkaanit atorneqarsinnaapput. Paasisassarsiorluni angalasarnerit pillugit aqqissuussinermik manna tikillugu atuuttumik taama allannguneq 2006-imi aningaasanut inatsisikkut ukiunilu missingersuusiortifiusuni naatsorsuutigeriikkat saniatigut landskarsimut artukkiissanngilaq.

Partiinut ukiumut tunngaviusumik 300.000 kr.-inik tapiissuteqartarnissamik siunnersuut Inatsisartut maanna katitigaanerat naapertorlugu ukiumut 1.500.000 kr.-inik aningaasartuuteqarnerunissamik kinguneqassaaq.

Ilaasortamut ataatsimut ukiumut maanna tapiissutigineqartartut 100.000 kr.-init 125.000 kr.-inut qaffanneqarnissaannik siunnersuut ukiumut 775.000 kr.-inik aningaasartuuteqarnerunissamik kinguneqassaaq.

Taamaalilluni naalackersuinikkut sulinermut aningaasatigut tapiissutit ukiumi aningaasanut inatsisip atuuffiani 2007-imi 2.275.000 kr.-iussapput. Siunnersuutigineqartutut inatsisip 1. juni 2006-imi atuutilerneratigut qaammatisiutit ukiuaannut sanilliullugu 7/12-lisut naatorsoraanni naalackersuinikkut sulinermut

aningsaatigut tapiissutinut ukiup aningaasanut inatsisip atuuffiata 2006-ip sinnerani aningaasartuutaanerussat 1.327.000 kr.-iussapput.

Inatsisartut siunnersuummik siullermeerinerat.

Amerlanerussuteqartut Siumumeersut, Inuit Ataqatigiinneersut Atassummeersullu siunnersuut maanna ilusimisut iluseqartoq taperserpaat.

Ikinnerussuteqartut Demokraatineersut Kattusseqatigiit Partiianneersullu siunnersuut tapersinngilaat.

Ataatsimiititaliami suliarinnineq.

Partiit kattuffiinik Inatsisartunilu sulinermut atatillugu taakku sulinerannik patajaallisaanissamik siunnersuutigineqartup aningaasalersornissaanut apeqqut siunnersuummik suliarinninnermini ataatsimiititaliap pingaernerutillugu suliaraa.

Ukiup aningaasanut inatsisip atuuffia 2006.

Siunnersuutip kingunerisaanik 1. junimit ukiup sinneranut aningaasartuutaanerussutissat 1.327.000 kr.-inik annertussuseqartut Inatsisartut 2006-imi missingersuutissaattut akuersissutigineqartunit sipaaruteqarnikkut aningaasalersorneqarnissaannut periarfissat ataatsimiititaliamit misissorneqarput.

Inatsisartoqarfiup allilerneqarnissaanik sanaartornissamut pilersaarutip piviusunngortinneqarnissaanut atatillugu allaffiit nuutsinneqarnissaannut ininillu avataanit attartornissamut Inatsisartut 2006-imi missingersuutaanni aningaasanik immikkoortitsisoqarpoq. Sanaartornerup ingerlanneqarnissaanut piffissaliussat pilersaarutit allanngornerat pissutigalugu aningaasartuut taanna 2006-imi aningaasartuutigineqassanngilaq.

2006-imi Inatsisartut ataatsimiinnerisa ataatsimiititaliamilu sulinerup ingerlanneqarnerata kingunerisaannik ataatsimiititaliat 2006-imi angalanissaannut aningaasaliunneqarsimasut sipaaruteqarfiunissaat naatsorsuutigineqarpoq.

Ukiumi aningaasanut inatsisip atuuffiani 2006-imi aningaasartuutaanerussutissat naatsorsuutigineqartut kontomi pingaarnermi 01.10.10-mi, Inatsisartunut tunngasumi, aningaasaliissutit 1.327.000 kr.-inik ikilisinnerisigut kontomilu pingaarnermi 01.06.11-mi, Naalackersuinikkut suliniaqatigiiffinnut aningaasatigut tapiissuteqarnermut tunngasumi, aningaasaliissutit taakku amerlaqataannik amerlineqarnerisigut aningaasalersorneqarsinnaapput.

Siunnersuut akuersissutigineqassappat maanna aningaasaliissutaasuni allannguutissat taaneqartut piviusunngortinneqassasut ataatsimiititaliami amerlanerussuteqartut inassutigaat.

Ukiup aningaasanut inatsisip atuuffia 2007.

Ukiup aningaasanut inatsisip atuuffianut 2007-imut ataatsimiititaliap missingersuutitut ilanngussaa katillugu annertunerpaamik 2,5 procentimik qaffaasoqarnissaanik kaammattuummik eqquutsitsisoq suliarineqarpoq.

Partiit akunnermiliuttunngortinnerisigut paasisassarsiorluni angalanernik atorluaanerunissamik naatsorsuutiginninneq naapertorlugu ukiumi aningaasanut inatsisip atuuffiani 2006-imi taaneqartut aningaasaliissutinik ikililerinerup kingorna 2006-imi atorineqartussat naatsorsuutigineqartut annertoqataannik ataatsimiititaliat angalanissaannut ataatsimoortumik aningaasaliissutit annertussusilerneqarsinnaasut ataatsimiititaliami amerlanerussuteqartut isumaqarput.

Inatsisartunut ilaasortanut immikkut naatsorsuullugit inissianik atugassiissutiginninnissaq pillugu Inatsisartut Naalackersuisunut isumaqatigiissutaata sunniutissaatut naatsorsuutigisat naapertorlugit utaqqiisaasumik ineqartitsigallanermut pequtanillu toqqortaatiginiinnermut ukiumoortumik sipaaruteqarnissaq naatsorsuutigineqarpoq.

Partiit kattuffiinik annertuumik nukittorsaaneq Inatsisartut Allattoqarfianni sulinerunerup annikilleriarneranik kinguneqassasoq naatsorsuutigineqarpoq. Taama naatsorsuutiginninneq eqquutsinneqassappat ilaasortat siunnersuutaannut atatillugu suliasat siunnersuutinik tunniussivissatut killigititaq sioqqullugu naammassereerneqarsimasariaqarput. Partiit allattoqarfiisa Inatsisartullu Allattoqarfiata akornanni suleqatigiinnermi suleriaatsip pitsaangornissaa aamma naatsorsuutigineqarpoq, ataatsimut isigalugu annertuumik sipaaruteqarnissamut tunngaviliisinnaasumik.

2006-imi aningaasanut inatsimmut sanilliullugu kontomut pingaarnermut 01.06.11-imut, Naalackersuinikkut suliniaqatigiiffinnut aningaasatigut tapiissuteqarnermut tunngasumut, missingersuutitut ilanngussakkut aningaasaliissutigineqartut 2.275.000 kr.-inik amerlineqarnissaat ataatsimiititaliami amerlanerussuteqartunit inassutigineqarpoq.

Naalackersuinikkut suliniaqatigiiffinnut aningaasatigut tapiissutinik taaneqartut qaffaanermut aningaasalersuutissatut kontomi pingaarnermut 01.10.10-p Inatsisartunut tunngasumut, missingersuutitut ilanngussakkut aningaasaliissutigineqartut 900.000 kr.-inik ikilineqassasut kontolu pingaarneq 01.01.01, Inatsisartut Allattoqarfiannut tunngasooq, 1.375.000 kr.-inik ikilineqarluni.

Amerlanerussuteqartut oqaaseqaataat.

Amerlanerussuteqartut Siumumeersut, Inuit Ataqatigiinneersut Atassummeersullu siunnersuummut tunngatillugu oqaatigissavaat siunnersuummi aningaasanik taaneqartunik naalackersuinikkut sulinermut aningaasatigut tapiissutinik pissarsinissaq partiinut ataasiakkaanut piginnaatitaaffiusoq. Taamaattorli tapiissutigineqarsinnaasutut periarfissiissutaasut tamakkerlugit tigusinnaannut partiit ataasiakkaat soorunami pisussaaffeqanngillat. Partiit naalackersuinikkut sulinermut

aningaasatigut tapiissutunik ikinnerusunik pissarsinissamik kissaateqartut tapiissutunik pissarsinissamik qinnuteqarnerminni tamanna nalunaarutiginnassavaat. Taamaaliornermi tapiissutit tunniunneqanngitsoortut landskarsimut nakkartinneqassapput

Ikinnerussuteqarluni oqaaseqaat.

Ikinnerussuteqartut Demokraatit ima ikinnerussuteqarlutik oqaaseqaateqarput:

Partiinut tapiissuteqartarneq pillugu maleruagassat ullumikkut atuuttut imaapput partiit ataasiakkaat Inatsisartunut ilaasortaataasa amerlassusiat apeqqutaatillugu partiit tapiissuteqarfigineqartarlutik. Taamaalillutik partiit Inatsisartunut ilaasortamut ataatsimut ukiumut 100.000 kroninik pissarsisarput.

Inatsisartut 31-inik ilaasortaarmata Landskarsimit ukiut tamaasa 3,1 millioner kronit partiinut tapiissutigineqartarput.

Partiit angisuut Inatsisartunut amerlasuunik ilaasortaataqartut maanna aaqqissuussinikkut annertuumik iluaqutissinneqartarput. Partiinut mikinerusunut annertunerusumik iluaqutissanngorlugu partiinut tapiissutip allanngortinneqarnissaa Demokraatinit kissaatigineqarneruvoq.

Taamaattumillu partiit Inatsisartunut ilaasortaataqartut tamarmik partiip qassinik ilaasortaataqarnera apeqqutaatinnagu ukiumut 200.000 kroninik pissarsisartunngorlugit partiinut tapiissutit allanngortinneqassasut Demokraatit isumaqarput. Tamatuma saniatigut partiit Inatsisartunut ilaasortaataqartut tamarmik ilaasortamut ataatsimut 60.000 kroninik partiinut tapiissutit pissarsisinneqartassapput. Taama aaqqissuussinikkut partiit mikinerusut Inatsisartunut tallimat inorlugit ilaasortaataqartut partiinut anginerusunut pisariaqartinneqartumik unammillersinnaanerulersinneqassapput.

Tamatuma saniatigut Inatsisartut maanna katitigaanerat naapertorlugu allannguutissatut siunnersuutigineqartoq Landskarsimut 240.000 kroninik sipaaruteqartitsissammat pingaaruteqarpoq oqaatigissallugu. Missingersuutit qanoq annertussuseqarnerat eqqarsaatigigaanni oqartoqarsinnaagunangilaq aningaasat amerlasuut pineqartut, taamaaliornikkulli nunatsinni aningaasaqarneq mianernaqisoq pitsanngortinniarlugu sorsuutiginninnermi naalakkersuinikkut suliaqartuusugut sallerajaajumanerput inuiaqatigiinnut oqariartuutigissavarput.

Kattusseqatigiit Partiiata tapersiinera.

Demokraatit ikinnerussuteqarlutik oqaaseqaateqaatit saqqummiussaak Kattusseqatigiit Partiiannit isumaqataafigineqarpoq.

Ataatsimiititaliap inassuteqaataa.

Amerlanerussuteqartut Siumumeersut, Inuit Ataqatigiinneersut Atassumeersullu
siunnersuummik aningaasalersuutissatut isumaliutissiisummi taaneqartut
ilanngullugit siunnersuut maanna iluserisamisut iluseqartoq akuersissutigineqassasoq
inassutigaat.

Ikinnerussuteqartut Demokraatineersup Kattusseqatigiillu Partiianneersup
siunnersuut itigartitsissutigineqassasoq inassutigaat.

Jonathan Motzfeldt
Siulitaasoq

Agathe Fontain

Otto Steenholdt

Palle Christiansen

Ruth Heilmann

Anthon Frederiksen